

松龕全集

閩錫山書齋



(四)

山西省文獻委員會編

山右叢書初編

趙戴文題



編校姓氏

山西省文獻委員會 總裁

閻錫山 百川

副總裁

趙戴文 次隴

徐永昌 次宸

常務委員

郭象升 允叔

馬駿 君圖

陳敬棠 芷莊

委員

賈景德 煜如

張友桐 曉琴

常贊春 子襄

狄樓海 觀滄

李鏡蓉 亮工

陳受中 乙和

邵修文 竹琴

陸近禮 恭齋

高時臻 福齋

李尙仁 綢卿

甯超武 子高

賈昭德 宜之

徐鴻寶 森玉

任晰 亮裁

常乃惠 燕生

趙正楷 法真

方聞 蒼光

顧問
編纂

田九德 玉如

原士才 石民

總幹事

于萬河 霞裳

幹事

焦陽三 養三

范士元 周君

常乃純 价中

校對

武敘疇 洪九

陳秀彥 元生

郭長民 漢鼎

邢淵經 伯涵

劉受福 百之

叙

是編奏疏二卷文集四卷詩集二卷又兩漢幽并涼三州今地考略一卷徐氏本支叙傳一卷予同里徐松龕先生遺箸也先生以碩學爲名臣出入三朝歷臺諫任封疆所條陳時務洞中機宜前清道咸之際海氛初熾英人百計狡營當事者率狃於侈大不能究厥底蘊或失則激往往有之先生蒞閩久務得其強弱勝負之所以然而不爲旦夕功曲意諂諂隨事防維大要不輕啓釁端示之無間可入以服其心而屈其計而深識遠慮常燭照數計於數十年之前數十年之後覆成局而案之有歷歷不爽者焉惜當時輿論囂然廷議未協先生雖疊荷知遇卒不得諧抵瑕者尤媒孽之旋即望議去而閩事亦日以壞矣先是朝廷命先生撫粵西時相密陳以閩撫鄭祖琛易之粵西事敗幾危全局識者歎焉事具五臺縣志同治初總理各國事務衙門奏設同文館先生奉召供館職年已老徘徊卿署者三載時西教習畢利干丁韋良等皆泰西名碩獨敬

禮先生諸王大臣莫能擬也今先生歿四十年矣世益變而事益亟而先生之
一身始也紛然今也漠然嘻可慨也已錫山生也晚未及親聆教訓而生先生
之鄉讀先生奏議及詩文集忠誠愷切規畫詳明未嘗不三致意焉初先生著
瀛環志略板藏同文館罕行世見者亦不之重自東瀛翻本出而坊肆乃流傳
殆遍蓋人心之好尚如此海防外復關心藩部有幽并涼三州考略之輯凡邊
疆形勢無不口講而指畫之今集中所載是也先生以絕異之才承尊人廣軒
先生家學平生最篤嗜兩漢書嘗有評釋未及訪得諸著述亦多散佚茲從其
門人畹香杜公處蒐得奏疏古文若干卷先生堂姪悅庭公所手鈔也晚而學
詩不主一家稿出人爭誦之近復搜集若干卷依類分次都爲一編而以考畧
叙傳附焉鄉邦後學儻有學先生之學志先生之志者乎則是編之刻已足津
逮至先生之爲傳人與先生文之必傳而無疑者則又不恃乎此也民國四年
陽曆十一月五臺後學閻錫山謹識

松龕全集目錄

奏疏上

特參州縣入省鑢營疏

特參州縣諱災催徵疏

特參藉端科歛疏

特參退賊誘結疏

請整頓晉省吏治疏

請除大臣迴護調停積習疏

政體宜崇簡要疏

授閩撫謝恩疏

報接任疏

報福州將軍出缺疏

報兼署督篆疏

覆查林則徐病體疏

請宋儒李綱從祀文廟疏

奉諭密防英夷疏

報英人租住神光寺並採買臺灣煤炭疏

再奉諭密防夷情疏

覆英夷租住寺屋寔情並鎮靜籌辦偵察謠言疏

籌防英人購買臺灣煤炭並換港口疏

覆官紳意見不合疏

奏疏下

揣度夷情密陳管見疏

覆周天爵原奏預防英夷疏

交涉華夷命案疏

再覆辦理夷務疏

覆英夷不肯搬出神光寺及釘塞砲尊疏

覆英夷搬出神光寺並琉球使臣遞文疏

再覆英夷搬出神光寺疏

三漸宜防疏

特參晉撫貽誤巖疆疏

請命將助剿疏

時充總理各國事務大臣

嚴查教匪以靖閭閻疏

商辦盜案稟上劉次白中丞

條陳山西防守事宜致王雁汀中丞

璐鹽芻議致王雁汀中丞

松龕全集

山右叢書初編

松龕徐繼畲著

奏疏 卷上

特叅州縣入省鑽營疏

爲嚴禁州縣久離職守入省鑽營以重地方而息奔競事竊維州縣爲親民之官必須時常在署公事方無遺誤臣聞各直省州縣往往托故進省爲營求升調之計累月經旬遷延不返署門懸公出之牌典吏代拆行之事相驗則委之鄰封案牘則畀之幕友冤抑無控訴之所動輒巨案緝捕無催比之日一任連逃吏治廢弛莫此爲甚以臣所知如山西州縣中史夢蛟林樹雲並稱能員史夢蛟任忻州最久一年之中在州署者不過三四月其餘八九月常在省中臣籍隸五臺密邇忻州知之最稔聞林樹雲任保德州亦復如此不知兩人終年在省所爲何事若云面稟公事何至曠日持久如曰委審要事省中豈無幹員

大約非爲本省營求遷擢卽爲他人旁通線索耳聞各州縣欲得好處者以兩人爲先容每到省中其門如市兩人在山西最久亦歷州縣甚多問其官聲紳民絕無頌感不過長於酬應善於逢迎歷任上官倚爲心腹名爲兩地守土之官實爲省垣壟斷之首一則由忻州升知府旋調首府一則由保德州調署汾州府此其盤省垣之功效也查兩州地方百里戶口數十萬一歲之中常有七八月無官不知倉庫監獄何人典守命盜案情何人勘驗戶婚爭訟何人判理水旱偏災何人查辦幸兩州民淳事簡尙無他變而刑政之廢弛不問可知墮職守而啟奔競此風斷不可長恐各直省中似此者正復不少相應請旨勅下各該督撫嚴飭各州縣非奉檄調或親解要犯不得無故進省其有事到省者事畢不得任意耽延希求調劑違者卽予嚴叅庶州縣各重職守而奔競之風亦漸息矣臣愚昧之見是否有當伏乞皇上聖鑒謹奏

特叅州縣諱災催徵疏

爲特恭諱災催徵之州縣請旨飭查以紓民困事竊查上年山東一省收成歉薄經該撫查明被災州縣分別奏請緩徵當蒙恩旨允准在案臣聞上年山東被災登萊青三府情形最重該撫奏請緩徵惟登州一屬不在其內查訪登州被災情形係上年七月間海風陡作一日一夜勢極猛厲秋禾正茂之時全致偃折仆地竟係顆粒無收與萊青不分輕重該州縣諱匿未報上年下忙錢糧照舊開徵災黎竭蹶完納膏髓已罄目下青黃不接糧價騰翔賣男鬻女道殣相望壯者棄產奔逃弱者填委溝壑人心洶洶朝不謀夕而今年上忙又開徵矣聞現在該府英文親赴各州縣勸捐蓬萊捐得制錢一萬餘千黃縣捐得制錢三萬餘千其餘各州縣亦俱捐有成數苟非情形急迫未必如此辦理何以上年秋間竟爾諱災不報旣已諱災必須開徵旣已開徵則分數不足便干參處該州縣自顧考成勢必從嚴催比當此災荒極重之時富民猶可輸納極貧下戶嗷嗷待哺加以胥吏之追呼必且激而生變在該州縣不過貪得平餘陋

規有心諱匿而民間慘酷情形置之不問如果登屬並不成災該府縣何以紛紛勸捐勸捐與催科並行尙復成何政體皇上軫念災區山東一省恩施普被而登州一屬獨困於州縣之屯膏以勸捐解玩視之謗而以催徵收囊橐之私下爲民命益殘上爲國家歛怨居心如此何可姑容相應請飭下該撫確查該府州縣諱災實情從嚴叅辦速將上忙錢糧停徵緩至今年秋後庶渥澤得以下究而民困稍蘇矣事關民瘼臣既有見聞不敢不陳伏乞皇上聖鑒謹奏

特參藉端科歛疏

爲特叅藉端科歛之知縣請旨嚴行查辦以儆官邪以蘇民困事恭查上年恩詔案內祭告歷代帝王陵寢在山西者欽派平陽鎮總兵部費晉往祭其商湯王陵在蒲州府屬之榮河縣界內臣聞該縣知縣武履中於上年十月奉文之後在署內設席遍請書差告以努力辦理大家沾光隨傳喚值年里長逐日在縣聽候辦差城內設公館七處湯陵附近設公館七處科派乾菜鋪墊銀一千

五百兩修理裱糊器皿燈籠綵綢紅氈夫馬一切雜派又五千餘兩其餘無名之費不可勝數該縣分十三里半每里按地丁一兩須攤銀六七八錢不等台計該縣地丁三萬餘兩自上年十月奉文之後胥吏四出日事追呼闔境騷然民不聊生臣訪聞之下不勝駭異竊思官祭品物例有支銷致祭大臣宜減從前往何至張皇數月朘削一方一切科派至二萬餘兩之多是該縣起意狼吞自飽私橐情節顯然兼恐該總兵有藉差需索情事山西祭告不止一處榮河如此他處恐不免相應請旨飭下該撫嚴行查辦勿事姑容勿任消弭以儆官邪而蘇民困是否有當伏乞皇上聖鑒謹奏

特參退賊誘結疏

爲特參退賊誘結之知縣請旨嚴飭查辦事竊查上年恩詔案內祭告商湯王陵榮河縣知縣武履中藉端科歛多金經臣奏參在案臣風聞該撫委員查訊該縣武履中得信之後浼人向本地紳民說合退還科斂原贓令該縣各里長

爲之出結該紳民良懦畏事業經爲之出結完案該撫疑其不實現在委員覆查等語臣竊思山西州縣貪墨成風或遇言官參劾或遇民人告發則百計消弭化爲烏有此種風氣歷來已久該縣武履中既經科斂於前復敢以此等伎倆脅誘紳民爲之出結了事現在該撫雖委員覆審而所委之員不過本省道府仰食州縣向來聯爲一氣原審之員既廻護該縣覆審之員必廻護原審該縣紳民既爲出結展轉欺蒙該撫亦將無如之何而貪官污吏終立於不敗之地從此益無忌憚矣相應請旨勅下該撫將該縣暨經年書差提省嚴究摘傳紳民里長明切曉諭務將該縣退贓誘結實情一並審出按律懲辦庶墨吏稍加儆畏而廻護消弭之積習可略除矣臣職司耳目有所聞不敢不陳伏乞皇上聖鑒謹奏

請整頓晉省吏治疏

爲晉省吏治廢弛請旨嚴飭整頓以肅官箴以除積習事臣竊維致治之道首

厲官方官方既肅而後民風日趨淳樸臣籍隸山西知其風土山西民俗勤儉古稱唐魏之遺賦稅如期不煩追比農賈相半絕少曠游惜身家而畏官吏重羞惡而鮮譸張在各直省中民情最爲安靜邇年來巨案迭興大吏多獲咎以去論者遂以山西一省昔稱樂土今爲畏途而不知皆吏治之不肅有以致之也大端有二請爲我皇上言之一由於操守之不講也晉省向有富足之名謁選者掣得山西欣然有滿載歸來之意然山西州縣陋規如平餘雜稅之類亦復無多辦公之餘斷不足酬其夙願繼之以請富戶賣案首猶不足也於是相率而取之詞訟晉民良懦畏事富者尤甚一人被繫舉家憂惶習知非賄不行不敢不傾囊以獻但得訟息額手稱慶雖復傾家蕩產斷未有敢以勒索等情上控者累萬盈千收入囊橐而安然無患也拚不潔之虛名享無窮之厚實上官飽其酬應不特不加參劾或反登之薦剡如榆次案之呂錫齡調繁缺者也太谷案之李聯蒙調首縣而加升銜者也一省之中相習成風恬不爲怪或遇